

妙法蓮華經 屬累品第二十二

爾時釈迦牟尼仏。従法座起。現大神力。

以右手摩。無量菩薩摩訶薩頂。而作是言。

我於無量。百千萬億。阿僧祇劫。

修習是難得。阿耨多羅三藐三菩提法。

今以付属汝等。汝等応当一心。流布此法。

広令増益。如是三摩。諸菩薩摩訶薩頂。

而作是言我於無量。百千萬億。阿僧祇劫。

修習是難得。阿耨多羅三藐三菩提法。

今以付属汝等。汝等当受持誦誦。

広宣此法。令一切衆生。普得聞知。

所以者何。如來有大慈悲。無諸慳悋。

亦無所畏。能与衆生。仏之智慧。

如來智慧。自然智慧。

如來是一切衆生之大施主。

汝等亦応随学。如來之法。勿生慳悋。

於未來世。若有善男子。善女人。

信如來智慧者。当為演説。此法華經。

使得聞知。為令其人。得仏慧故。

若有衆生。不信受者。当於如來。

余深法中。示教利喜。汝等若能如是。

則為已報。諸仏之恩。時諸菩薩摩訶薩。

聞仏作是説已。皆大歡喜。徧滿其身。

益加恭敬。曲躬低頭。合掌向仏。

俱發声言。如世尊勅。当具奉行。

唯然世尊。願不有慮。諸菩薩。摩訶薩衆。

如是三反。俱發声言。如世尊勅。

当具奉行。唯然世尊。願不有慮。

爾時釈迦牟尼仏。令十方來。諸分身仏。

各還本土。而作是言。諸仏各随所安。

多宝仏塔。還可如故。説是語時。

十方無量分身諸仏。坐宝樹下。

師子座上者。及多宝仏。并上行等。

無辺阿僧祇菩薩大衆。舍利弗等。

声聞四衆。及一切世間。天人阿脩羅等。

聞仏所説。皆大歡喜。